

ЎЗБЕКИСТОН РЕСПУБЛИКАСИ  
ПРЕЗИДЕНТИНИНГ  
ҚАРОРИ



ПОСТАНОВЛЕНИЕ  
ПРЕЗИДЕНТА  
РЕСПУБЛИКИ УЗБЕКИСТАН

2017 йил „ 17 “ ноябрь № ПҚ-3393 „ “ 20 г.

**“Хунарманд” уюшмаси фаолиятини янада такомиллаштириш  
чора-тадбирлари тўғрисида**

Ўзбекистон Республикаси Президентининг 2017 йил 17 ноябрдаги “Хунармандчиликни янада ривожлантириш ва хунармандларни ҳар томонлама қўллаб-қувватлаш чора-тадбирлари тўғрисида” ПФ-5242-сон Фармонининг ижросини таъминлаш ҳамда “Хунарманд” уюшмаси ташкилий тузилмасини оптималлаштириш асосида унинг фаолиятини такомиллаштириш ва самарадорлигини ошириш мақсадида:

1. Қуйидагилар “Хунарманд” уюшмаси фаолиятининг устувор йўналишлари этиб белгилансин:

**биринчидан**, хунармандчиликни янада ривожлантириш, халқ хунармандчилиги ва амалий санъатнинг анъанавий турларини сақлаш ва қайта тиклаш, хунармандчилик маҳсулотларининг рақобатдошлигини ва сифатини ошириш бўйича тизимли ва мақсадли чора-тадбирларни амалга ошириш;

**иккинчидан**, аҳолини хунармандчилик фаолиятига кенг жалб этиш, хунармандчилик соҳасида бандликни кенгайтириш учун қулай шарт-шароитлар яратиш, хунармандларни давлат рўйхатига олишда кўмаклашиш, хунармандчилик фаолияти билан шуғулланувчи шахсларнинг ягона реестрини юритиш;

**учинчидан**, хунармандчилик соҳасидаги қонунчилик ва меъёрий-ҳуқуқий базани такомиллаштириш, хунармандларнинг ҳуқуқлари, эркинликлари ва қонуний манфаатларини ҳимоя қилишда иштирок этиш, шу жумладан Ўзбекистон Республикаси Савдо-саноат палатаси билан ҳамкорликда давлат органларида хунармандларнинг манфаатларини ифодалаш бўйича таклифлар ишлаб чиқиш;

**тўртинчидан**, хунармандчиликни ривожлантириш бўйича лойиҳаларни амалга оширишда иштирок этиш, хунармандчиликни ривожлантириш марказларини ташкил этиш ва такомиллаштириш, сайёҳлар учун жозибador бўлган хунармандчилик объектлари яратиш;

**бешинчидан**, хунармандчилик маҳсулотларини кенг жамоатчилик орасида оммалаштириш, истеъмолчиларга хунармандчилик маҳсулотларини истеъмолчиларга сотиш, жумладан уларни экспорт қилишни рағбатлантириш, учун қулай шарт-шароит ва зарур инфратузилмани яратиш;

**олтинчидан**, хунармандчилик соҳасида авлодлар ворислигини таъминлаш, хунармандларнинг ёшларни меҳнатсеварлик, инсонпарварлик ва миллий қадриятларга садоқат руҳида тарбиялашда фаол иштирокини рағбатлантириш, “Уста-шогирд” мактабларини такомиллаштириш ва фаолияти самарадорлигини ошириш.

2. Қуйидаги янгиланган:

“Хунарманд” уюшмасининг ташкилий тузилмаси 1-иловага мувофиқ;

“Хунарманд” уюшмасининг 33 нафар бошқарув ходимларидан иборат ижро аппарати тузилмаси 2-иловага мувофиқ;

“Хунарманд” уюшмасининг Қорақалпоғистон Республикаси, вилоятлар ва Тошкент шаҳридаги бошқармалари намунавий тузилмаси 3-иловага мувофиқ;

“Хунарманд” уюшмасининг туманлар (шаҳарлар)даги бўлими намунавий тузилмаси 4-иловага мувофиқ маъқуллансин.

Уюшма раисига, зарурат бўлганда, уюшманинг ташкилий тузилмаси, ижро аппарати, худудий бошқармалари ва туман (шаҳар) бўлинмаларининг тузилмаларига ўзгартиришлар киритиш ҳукуки берилсин.

3. Ўзбекистон Республикаси Президентининг 2017 йил 19 июндаги “Ўзбекистон Республикаси Савдо-саноат палатаси фаолиятини ташкил этишни такомиллаштириш тўғрисида”ги ПҚ-3068-сон қарорининг 1-иловасига мазкур қарорнинг 5-иловасига мувофиқ ўзгартириш киртилсин.

4. Қуйидагилар “Хунарманд” уюшмасининг даромадларини шакллантириш манбалари этиб белгилансин:

“Хунарманд” уюшмаси аъзоларининг аъзолик бадаллари;

халқаро донорларнинг грантлари, ҳомий ташкилотларнинг маблағлари;

вақтинча бўш турган маблағларни тижорат банкларининг депозитларига ва бошқа молиявий воситаларга жойлаштиришдан тушадиган даромадлар;

пуллик хизматлар кўрсатишдан олинган даромадлар;

конунчиликда тақиқланмаган бошқа тушумлар.

5. Ўзбекистон Республикаси Савдо-саноат палатаси, “Хунарманд” уюшмаси хунармандчилик маҳсулотларини узокдаги туманлар (шаҳарлар)дан сотиб олиш ва келгусида йирик шаҳарларда сотиш ҳамда экспорт қилиш учун “Хунарманд” уюшмаси ҳузурида савдо-харид қилиш корхоналари ташкил этилишини икки ой муддатда таъминласин.

6. “Хунарманд” уюшмасига касаначилик маҳсулотлар (ишлар ва хизматлар) ишлаб чиқариш функциясига эга бўлган таркибий бўлинмалар ташкил этиш, шунингдек, пудратчи корхоналар сифатида, айниқса республиканинг кишлоқ ва узок туманларида, касаначилар билан хунармандчилик маҳсулотлари ишлаб чиқариш бўйича шартномалар тузиш ҳукуки берилсин.

7. Қорақалпоғистон Республикаси Вазирлар Кенгаши, вилоятлар ва Тошкент шаҳар ҳокимликлари Ўзбекистон Республикаси Хусусийлаштирилган корхоналарга қўмаклашиш ва рақобатни ривожлантириш давлат қўмитаси, Ўзбекистон Республикаси Ер ресурслари, геодезия, картография ва давлат кадастри давлат қўмитаси, Ўзбекистон Республикаси уй-жой коммунал хизмат кўрсатиш вазирлиги, “Хунарманд” уюшмаси билан биргаликда икки ой муддатда:

“Хунарманд” уюшмасининг вилоят бошқармалари, туман ва шаҳарлар бўлимларини жойлаштириш учун бино ва иншоотларга бўлган эҳтиёжини ўргансин;

Ўрганиш натижаларига кўра, “Хунарманд” уюшмасининг вилоят бошқармаларини, туман ва шаҳарлар бўлимларини фойдаланилмаётган давлат мулки бинолари ва хоналарига жойлаштириш учун уларни “Хунарманд” уюшмасига бепул фойдаланиш учун топшириш чораларини кўрсин.

8. Тошкент шаҳар ҳокимлиги Республика хунармандчилик марказини ташкил этиш ҳамда хунармандчилик маҳсулотлари ва миллий либослари кўرғазма-ярмаркаларини доимий равишда ўтказиш мақсадида Олмазор тумани, Зарқайнар кўчаси, 1-уй манзилида жойлашган “Зарқайнар” миллий либослар галереясини “Хунарманд” уюшмасига бириктирсин.

9. Ўзбекистон миллий телерадиокомпанияси, “Хунарманд” уюшмаси, Ўзбекистон Республикаси Савдо-саноат палатаси, Ўзбекистон Бадиий академияси, шунингдек бошқа манфаатдор вазирликлар ва идоралар:

икки ҳафта муддатда хунармандчиликни ривожлантириш ва хунармандларни хар томонлама қўллаб-қувватлаш чора-тадбирлари натижаларининг оммавий ахборот воситаларида кенг ёритилишини таъминлайдиган медиа-режани ишлаб чиқсин ва тасдиқласин;

медиа-режада тасдиқланган тадбирлар ёритиладиган телевидение ва радиоканалларни бир ой муддатда белгиласин;

белгиланган телевидение ва радиоканалларда медиа-режанинг тасдиқланган мавзули ва кўчма дастурлари, ток-шоулар, интервьюлар ва бошқа хунармандчиликни ривожлантириш масалаларини намойиш этиш учун эфир вақтининг, жумладан энг тифиз вақтларда, бепул ажратилишини таъминласин.

10. «Хунарманд” уюшмаси Тошкент шаҳар, Дўмбробод кўчаси, 74-уй манзилига жойлаштирилсин.

11. Ўзбекистон Республикаси Адлия вазирлиги “Хунарманд” уюшмасига янги талаб ва вазифалар ҳисобга олинган янги таҳрирдаги Уставини тайёрлашга ва давлат рўйхатидан ўтказишга кўмаклашсин.

12. Ўзбекистон Республикаси Савдо-саноат палатаси “Хунарманд” уюшмаси, Ўзбекистон Республикаси Адлия вазирлиги ва бошқа манфаатдор вазирликлар ва идоралар билан биргаликда икки ой муддатда конун ҳужжатларига ушбу қарордан келиб чиқадиган ўзгартириш ва қўшимчалар тўғрисидаги таклифларни Вазирлар Маҳкамасига киритсин.

13. Мазкур қарорнинг бажарилишини назорат қилиш Ўзбекистон Республикаси Бош вазирининг ўринбосари Ж.А. Қўчқоров, Ўзбекистон Республикаси Савдо-саноат палатаси раиси А.И. Икромов ҳамда Бандлик ва меҳнат муносабатлари вазири А.А. Хаитов зиммасига юклансин.

Ўзбекистон Республикаси  
Президенти



Ш. Мирзиёев

Тошкент шаҳри

Ўзбекистон Республикаси Президентининг  
2017 йил “ 17 ” ноябрдаги ПҚ-3393-сон қарорига  
1-илова

**“Хунарманд” уюшмаси  
ТАШКИЛИЙ ТУЗИЛМАСИ**



**“Хунарманд” уюшмаси ижро этувчи аппарати  
ТУЗИЛМАСИ**




\*) бўлим Тошкент шаҳрида аҳолини хунармандчиликка жалб қилиш ва ва хунармандчилик билан шугулланувчиларнинг ҳисобини юритиш билан шугулланади.

### Қорақалпоғистон Республикаси ва вилоятлардаги “Хунарманд” уюшмаси бошқармаларининг НАМУНАВИЙ ТУЗИЛМАСИ



**Изоҳ:** Бошқармалар ходимлари сони хунармандлар сонидан келиб чиқиб, 7-10 нафар атрофида белгиланади.

**“Хунарманд” уюшмасининг хунармандлар сони 100 нафардан ортиқ бўлган туман (шаҳар) бўлимларининг  
НАМУНАВИЙ ТУЗИЛМАСИ**



Ходимлар сони 4-5 нафар атрофида белгиланади.

*Изоҳ:* Хунармандлар сони 100 нафардан кам бўлган туман ва шаҳарларда “Хунарманд” уюшмаси туман (шаҳар) бўлимнинг бошқа тузилмасини белгилайди.

Ўзбекистон Республикаси Президентининг  
2017 йил “ 17 ” ноябрдаги ПҚ-3393-сон қарорига  
5-илова

**Ўзбекистон Республикаси Президентининг  
“Ўзбекистон Республикаси Савдо-саноат палатаси фаолиятини ташкил  
этишни такомиллаштириш тўғрисида” 2017 йил 19 июндаги ПҚ-3068-сон  
қарорига киритилаётган ўзгартириш**

Ўзбекистон Республикаси Президентининг “Ўзбекистон Республикаси  
Савдо-саноат палатаси фаолиятини ташкил этишни такомиллаштириш тўғрисида”  
2017 йил 19 июндаги ПҚ-3068-сон қарорига 1-илова куйидаги таҳрирда баён этилсин:

**“Ўзбекистон Республикаси Савдо-саноат палатасининг  
ТАШКИЛИЙ ТУЗИЛМАСИ**

